

Diverses vom Velojahr 2020

sVelojahr 2020 isch jetzt verbi
Äs isch äs ganz - äs ussergwöndlichs gsi
Bis fascht Mitti Mai hät mer müäse warte
Bis mer hät dörfä - idä Gruppä startä

Jo diä weltwiti Corona-Pandemi
isch leider - immer no nöd vorbi
Ich hoffä fescht – mer blibet xsund
So laufts snörchscht Johr - denn wider rund

ä paar Sprüch hani usgstudiärt
Und einige Vorkommnis denn notiärt
Fürs Velojahr - aber ganz churz ischt gsi
Sind mini Versli - hüt ächli chli

Verschidenäs hani selber gseh
Äs tuät mir zum Teil fascht ächli weh
Jo – passiärt - sind einigi Sache
Teils zum brüälä – teils zum lachä
90% - ischt denn wüerkli passiert
10 devo – hani dāzuä kreiärt

Dä Albert Müller – mit grossem Wilä
got uf Thailand – mit Golfball go spilä
Am Obig liit er denn nöd nur am Schermä
Nei - schlitzäugigi Damä tüänd ihn umschwärmä
Ich hoff - di nörchstä Feriä - tüänd ihm au grotä
Gnauers – wird er jo sicher nöd verrotä

Ganz früä im Johr 20 – bi Sturm und Wind
Will dä Isenegger - no schnell i pFeriä gschwind
Sin Flüger - cha aber so nöd startä
Dä Rolf und pFrau müänd eifach wartä

am Obig - isch er denn im Tele Züri cho
vor Kamera häns eifach dä Schönschti gno
Sicher bini nümä – ich müessti lüügä
Öpps no am glichä Tag - händ chöne flüügä

Im April hani idä Schwägälp - 3 komischi Viicher gseh

Si träget öppis ufem Buggel – äs tuätnä glaub weh
tUrsüchtig - ischt nöd grad wintertauglich gsi
Ich ha gstudiärt – wo wänd diä denn hi

Aha – das sind Velofahrer – jetzt ischsmer im Klarä
Diä händ nöd wölä – uf dä Hauptstross fahrä
Dä Alpweg häns gwählt – zehrscht über grüäni Mattä
Und plötzlich häns ganz tüüf - im Schnee müäse wattä
Nei – äs sind kei Geissä, Schööf oder Chueli
Äs sind – üsi Mischel, dä Rosche und dä Ueli

Dä Lui – ihr glaubets nöd – cha fascht nöd wartä
Bis er cha – a dä Kohlweidtuur startä
Er isst am Morgä – ganz vil Spaghetti
Und tänkt denn – problemlos – mittcho wetti

Er fahrt an Start – zudä Rietackerhalä
Hä – komisch – das tuät ihm jetzt gär nöd gfalä
Er ischt dä einzig – und das macht ihm Müä
Fazitt – er ischt ganz eifach - ä Wuchä zfrüä

Dä Rosche Metzger – än chräftige Ma
Hät adä Cholweid- und Albistuur grad 2x Pech gha
Äs lauft ihm würkli ganz verschisse
äs hät ihm grad auno Kettä grissä

Ä grosses Stuck hät er denn müäsä laufä
Und für hei - no fascht es ÖV-Bilet müäsä chaufä
Zudä vereinigte Wandervögel wechslä - isch er nöd bereit
Det isch - usschliässlich - NUR no wanderä agseit

Ich säg jetzt öi eis – und das ischt kän Seich
Dä Rosche schribt – sRegelement – das sig bireweich
Do chan ich selber - im Gheime nur lache
Vilicht - chönnt er das viel besser machä ??

d`Mischel isch au nöd zfridä mit üsem Reglement
sNeui - fürs Johr 21 - ischt halt no pendent
Si hät drum sAlti – verfluächt und ghasst
Ufs nöii Johr – giz eis - wo allnä passt

Und denn hani do no - dä Marty Walter
Än Fahrer – auscho im höhere Alter

annerä Tuur – idä Gegät vo Felbä
Tuät er lutstarch – än Plattä meldä

Dä Kluppmeischer – üsere GLP
Hät das bemerkt - und sofort gseh
Diä beidä tüänd nöd lang studiäkä
Und wänd än nöiä Schluch montiäkä

Verhaltä – händ diä sich nöd grad gschickt
Si händ - dä Alt - wider inägflickt
Jetzt nämets än anderä - vos no händ gha
Dä hät aber auscho - 3 Flick-Chleber dra

Jetzt gsehnd die beide sofort ii
Dä alt Schluuch - ischt sicher 30 jöörig gsi
Dä Ueli gsehts – tuät nöd lang studiäkä
Und denä - än nigelnagel Nöiä spendiäkä

Am 9. August – und das ischt kein Kohl
Äs ischt passiert am Riih – bim Brüggli Nohl
Nachärä Tagestuur - lönd sich ä paar nöd lumpä
Und tüänd im Renntönü – in strömendä Rii abä gumpä

Jetzt chunnt aber sBescht – jetzt müänder losä
Ä paar händ plötzlich än Aal idä Hosä
äs isch intressant – shät niämer reklamiert
Ufäm Heiweg - heget diä sehr guät gschmiärt

Ui – das darfi jetzt nöd vergessä
S-Underohringer Maroniessä
Es ischt bald jedä Herbst än grosse Knüller
Herzliche Dank – äm Walti Müller

Dä Dubs - jo ich bi zfridä im grossä und ganzä
Ich ha eifach - än vilän zgrossä Ranzä
Als Presi - wetti denn schomol abgä
Wer würd das Ämtli – ämol überneh?

Jetzt wünsch ich öi allnä zum Johresrescht
Äs glücklich und zfridäs Wienachtsfescht
Ich hoffä - mir werdet üs ali bald wider gseh
Öppis anders – tät mir im Herzä recht weh